

ASO FARAILE, 05 FEPUARI 2021

Na nofoia e le Fofoga Fetalai le Nofoa i le itula e 9:15 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoaofa Fafuafafu.

Ia, avea ia leni avanoa e faatalofa atu ai ma le agaga faaaloalo i le paia o le Palemene i le afio o lau Afioga i le Taitai o le Malo, le Kapeneta aemaise o sui usufono mamalu, faapea foi le tapuaiga a Ofisa Sili o Pulega o Matagaluega ma Faalapotopotoga eseese a le Malo ma le atunuu.

ISI FAASILASILAGA A LE FOFOGA FETALAI

FOFOGA FETALAI: O nai faasilasilaga laiti a le Fofoga Fetalai. E faamanatu atu i le paia o le Palemene i sui usufono mamalu uma, mo le sagatonu o faamaumauga aloaia o felafolafoaiga a le Palemene

E talosagaina faasaoga a sui usufono ina ia faapena ona tuuina mai i totonu o le 4 aso e pei ona tuuina atu ai a tatou tualumaga, ina ia faapena ona mautu ma sao atoatoa faamaumauga o le tatou Fonotaga.

TUUINA ATU O PEPA

Na tolaulauina e le Failautusi i le Fono Aoaofa le faasologa o Pepa e tusa ai ma T.T.49(2).

1. P.P.2020/2021 Nu.129, Lipoti Faaletausaga a le Auaunaga o Falepuipui ma le Toefuataiga, tausaga faaletupe faaiiina i le Aso 30 Iuni 2020.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2020/2021 – felafolafoaiga faaauau i luga o le faitauga faalua – Aso 13

FOFOGA FETALAI: E tolopo Galuega a le Fono Aoaofa i le aso Fono ananafi ua maea ona saunoa le sui usufono mo Aleipata Itupa i Lalo le

Afioga i le Matua ia Tafua. Ia, ma o le avanoa lenei e tapa ma le faaaloalo se isi sui usufono e tulai mai e faaauau le avanoa, saunoa e tusa ai o le faafofoga mai a le tatou atunuu i le Tala Faatatau Faaopoopo o le Tupe.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai...

FOFOGA FETALAI: Ia, malo faafetai. O lea ua tulai mai se tasi o sui usufono sinia, sui usufono matua.

Afioga Hon Faumuina Tiatia Faaolatane Liuga: Lau Afioga i le Fofoga Fetalai leai, ou te le... ou te faatalitali se i... a o le taua ia o le faasilasilaga lea na e saunoa nei i ai. E ala ona taua, leaga o lou faamasinoga foi o mea nei o palota, na faaoga ai le Hansard. E tataua la, aua ou te iloa o lea e silafia e le tatou Ofisa, o au o lau matafaioi lea na ona aumai lava ou tago faasao toe avatu. E pei o le faataua lena, leaga e faaoga e le Faamasinoga i le auililiina po o le a tonu lava le intention o le Palemene na faatalanoa ai lea Tulafono ma lea Tulafono.

Ma lou faaaloalo lava. Faafetai.

FOFOGA FETALAI: Malo faafetai. O le mafuaaga lena ua faapena ona toe faamanatu atu, ona o lo o faapena ona... tulou, i sala le gagana o le upu e foi mai i le Nofoa, o lo o faapena ona faatalale i ai le mamalu o sui usufono, a o ia faamaumauga o ni faamaumauga e aupito sili ona taua mo le lumanai.

O le mea la lea ua tulai mai le sui usufono mo Palauli le Falefa le Afioga ia Faumuina e faamanatu, ia, o se itu taua tele lea. O le mea la lea, tautuana ma outou Afioga.

Ia, tulai maia se sui usufono e faaoga lenei avanoa taua. Ia, o lea ua tulai mai se tasi o sui usufono sinia, o le sui usufono matua foi o lea Itu o le tatou Maota mai le itumalo faaalaalafaga o Anoamaa Sisifo, lau Afioga Hon. Lauofo Fonotoe Nuafesili Pierre.

Tofa Hon LAUOFO FONOTOE NUAFESILI PIERRE LAUOFO (Anoamaa Sisifo): Faafetai atu i lau Afioga i le Fofoga Fetalai. E faatalofa atu foi ma ofo alofa atu i lenei taeao, ae faapea foi le eetai mai o le Afioga i le Palemia ma le Aiga Kapeneta, Afioga i Minisita Lagolago ma lena Itu o le malu. Ia, o lea foi e afifio atu Afioga i Taitaifono ma Sui Taitaifono ma sui usufono mamalu o Komiti Tumau Faa-Palemene, faapea foi Komiti Faapitoa Faa-Palemene.

Ia, o lea ua manino o le tauaofiaga mulimuli lenei o lenei Paeaiga, ia, ona manatu lea, o lea ua faalala nei sa o tautai o le vasa, ua silimea foi le seuga aua ua ae mai faiva o aliiseu, a ua taoto foi i lagatonu le pale o le Talalelei, ae ua tala foi fusi o tautiaga e ala i le taulaga osia. Ia o le vatapuia lea o

faapepepega ma le Atua soifua. Malo faafetai i lau Afioga i le Fofoga Fetalai, o lea ua mua mea i Matautusa i lenei taeao.

Ae ou te manatu o lea ua faliu le la i le tauafiafi e taliuta ai le tatalaumea aua ua fou maea folauga o lenei Paeaiga, le Paeaiga Lona XVI o le tatou Malo Tutoatasi o Samoa. Ua pale foi le la i le ituaso na faailo e ata gafoa o le taeao, ae a le talitaliuli o le fetu sopolagi? E faafetaia ai le tapuaiga a le atunuu, o lea ua tau manuia le faaiuga o feau ma galuega faa-Palemene o lenei 5 tausaga. Ua maea la ona utupupu le vai ma mapu ane i le sasaga, ua mapuea foi le i'asa sa folau i le vasa ina ua taunuu i le gataifale o le tai toa toe tai malu.

E fia faaleo ai le faafetai a lenei itumalo i le tapuaiga a le atunuu i ona paia ma mamalu, i ona sa ma tapu, e afua mai i le matafanua i Tapaga i le maota i Matautunaaai, e papai atu i le siufanua o le atululuga i le maota i Fili ma Puletuu i le oneone sinasina ma le sami ulaula a le tamaitai. I le afifio o Tama ma Aiga, o Aiga ma latou Tama, Aiga o Tupu, Aiga o Nofo ma Aiga o Papa. E faapea foi tupua iloga o le atunuu o lo o fetuunai ai muniao i le faautaga sailimalo e ponaoo ma tulatoa, o faleupolu tofia i le tupu, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ua faamalo foi le tapuai i Lana Afioga Mamalu O Le Ao o le Malo ma le Masiofo, faapea foi lau Afioga i le Sui Tofia ma le faletua, aemaise foi le tapuaiga i le Faamasino Sili, Sui Faamasino Sili, le Peresetene ma le Vasega o Faamasino.

Lau Afioga i le Fofoga Fetalai, e le galo i lou loto le nofo tapuai mai o tupu ma ee i le itu i Sasae, i le la foi itu o le atunuu, e ui ina eseese a tatou Faigamalo, ae mausali lava le talitonuga, e tasi lo tatou ali e tasi foi lo tatou fala, aua e tasi lo tatou toala fanau. I le paia ma le mamalu ia Sua ma le Vaifanua, Fofu ma Aitulagi, Ituau ma Saole, Saleaamua, le Launiu na Saelua ma le nofo a Maopu, faapea upu i le Faleagafulu. E faapea foi le afifio o Alii, o le Laau Amotasi, Faatui o le Motu ma le Auvaa o Tootoo ia ma upu i le Motusa.

E fia faafetaia foi le tapuaiga i le faigamalo fou a Amerika Samoa sa faauuina i le masina ua tuanai atu i le afio o le Afioga i le Kovana Sili, Lutena Kovana ma le Kapeneta, afio foi le Peresetene ma Senatoa o le Maota o Senate, ae faapea foi le afio o le Fofoga Fetalai ma sui mamalu o le Maota o Sui, ae tainane le tapuaiga a le Afioga i le Faamasino Sili ma le Vasega o Faamasino.

E le faagaloina i le loto ma le agaga le tapuaiga a le itupa gafua, o le gafa na sema i le lagi. E ui ina tomuli se faafetai i auauna paia a le Atua, ae tumau pea ma silisili lo outou taua. Aua a e tomua, e ao ia te oe faalupega o Samoa, a e taloto, e fatu ia te oe le ola manuia o Samoa, a e tamuli foi, e iu i le Atua le viiga ma le faafetai ona o galuega a Samoa ua tino. Le aufaigaluega paia e a le Atua, e ioe le taofi ua suni tau i le tini faamoemoega a lau Palemene i lenei 5 tausaga, i lo outou punopunouai faa-laau sautia o le tausoga i tafa e

fia o le atunuu, e ala i o tatou tofi mai le Atua. Ua faafetai tatalo, ua faamalo tapuai.

O le Tala Faatatau Faaopoopo o le Tupe o lenei tausaga faaletupe, ua faamauiina le faaauauina pea o atinae ma galuega e pei ona faapolokalameina i lalo o le Tala Faatatau Autu o Tupe e pau mai i le masina o Iuni 2021. Faafetai mo polokalame faaauau mo le faaleleia o afioaga ma itumalo o le atunuu, ua tele atinae a lenei itumalo ua maea ona faatino. E momoli atu ai le faafetai i lau Afioga i le Minisita ma le Matagaluega, vagana ai nai talosaga e le o toe tele, na o nai taligalu ma nai auala galue o lo o totoe. E tatalo atu ai se i manatua ane e lau Afioga i le Minisita ma le Matagaluega.

Lo tatou itumalo, ia, o lea ua taoto le saunoaga a le Malo, e i ai se aso ona oo atu lea o le faagasologa o galuega o lo o totoe, ae malo le tapuai. Faafetai le onosai, malo le faapalepale.

Lau Afioga i le Minisita mo Galuega, ae ou te le i see ese i le mataupu lea ae semeamanu o lea tatou te i ai pea i le vaitaimi o le louloua o le tau ma timuga. Ae na o se faamanatu, ou te talitonu o lena ua silafia e lau Afioga ma le Matagaluega le mafatia foi o lenei itumalo i lologa, e pei ona silafia e lumafale i le moana ae tuafale i mauga. A oo ina mamafa timuga, e faapena le tulaga ua i ai, ua mafatia i le tele o le suavai salalau solo, ona e tafe mai i uta i mauga. E pei lava ona matauina i lenei foi vaitau ua tatou i ai, ua le gafatia e vaitafe le tele o le vaitimu e pei ona palasi i lenei foi vaitaimi ua i ai le soifuaga. Ia ae se i manatua ane, faapea tulaga foi ia o tatou tafaala i mauga ia i tafaala i le agai atu i sasae, ona o lo o tulai mai pea mea o solo. Ae faafetai i le Atua e oo mai i lenei vaitau e le i afaina se soifua o se isi. Ae se i tagai ane pe i ai se fuafuaga e mafai ona fai i lea tulaga ina ia taofiofia ai le solo i luga o auala i le itumalo o Anoamaa ma Anoamaa ma le agai i tua i Aleipata i le la itu o le atunuu.

Lua o se mataupu e fia oo i ai se tautalaga, o le fuafuaga mo le fausiaina o le faatanoa lea e i i i Alaoa, o se fuafuaga lelei, e lagolagoina malosi e lenei sui usufono, a o se atinae foi vaaimamao, vaaimamao i le isi 50 agai i le 100 tausaga. O lea foi e matau e pei o i i Alaoa lea e fuafua mo lea faamoemoe. I le matau a lou sui usufono, e pei e foliga mai o le faasiusiu lea o le vanu tele lea e agai mai uta i Tiavi i le itu i sasae ifo o Malololelei, a o le vanu o se vanu e matua loloto. O lona uiga, o se poloketi lelei tele le poloketi lea, i le fuafuaina o le faatanoa lea e pue ai ma teuina ai le suavai mo faamoemoe e eseese a le atunuu, ae faapea foi le gaosiaina o le eletise, aemaise lava le faamoemoe mo iinei i le Fale Vaimauga ma Faleata, iinei i le taulaga. O le mea lea e momoli atu ai le faafetai i le Afioga i le Minisita ma le Malo mo lea fuafuaga tele ma le taua, aua e pei lava ona silafia, o le tulaga lea ua i ai nei uta i le tuasivi i luga o mauga ia o le Fale Vaimauga, o la ua tele ina faatoa ma nofoia. Aua o le tele o le isi vaega o le vaomatua sa tapue ai le suavai ma faasoaso malie mai i tai nei, ua leai se vaomatua. A o fuafuaga la lea mo le faatanoa lea, o le tulaga lea ua matua taua tele. A

faataoto lelei ni a tatou alavai mautu ma lelei, tatai uma ai le vai lea, e tele le vai lea e palasi mai pe a tetele timuga, tatai uma i le vanu lea e teuina ai i i i le faatanoa lea. E pei o le tulaga lena. Aua o le mea lea e matau i uta i le agai mai i tai, o lea foi sa saunoa nisi o sui usufono o le Fale Vaimauga ma se tasi o sui usufono mo Faleata, a palasi timuga tetele i uta i tuasivi, o le sau la e ua sau ai ua salalau, ua salalau solo, ua sau i vaifale, ua sau i autafa o fale, ua sau i totonu o fale o isi aiga. E matautia le mea lea e i ai. E faapena foi i timuga lea na tea atu i le la vaiaso, ma timuga tetele i lena masina ua tuanai atu. Ae a fai se faiga e tatai uma ai le vai mo le tatou faamoemoe lea, ia o se fuafuaga matua lelei tele i lou lea taofi faa-sui usufono. E momoli atu ai le faafetai i fuafuaga lelei mo le tatou atunuu. Aua e tu i uta i luga i le itu i sisifo o Malololelei, e te vaai ifo i lalo i Moamoa ma Faleata. O lau la vaai, o le tele o le isi vai lea e mafatia ai Faleata, o la e sau mai uta i le itu lea i Malololelei. A e tu foi ma e tepa i Sasae, ia o la e taoto mai le Fale Vaimauga, o lea foi la e tafe mai le isi vai lea e afaina uma ai, aemaise nai afioaga ia e i lalo i i e tulalata i le taulaga, i i i le Fale Vaimauga.

E pei o fuafuaga ia ua fia oo i ai se tala i lenei taeao, ona e manatu lou sui usufono o se fuafuaga lelei ma le vaaimamao. Malo faafetai.

Ia...

FOFOGA FETALAI: Ia, malie le sui usufono se i tulai mai le Minisita o Tupe.

Afioga Hon Sili Epa Tuioti (Minisita o Tupe): Lau Afioga i le Fofoga Fetalai, e momoli atu le faafetai i le Afioga i le sui usufono o lo o saunoa nei. O le taimi lenei, ua leva ona galulue le Matagaluega o Tupe ma le Faletupe o Atinae o Asia, o i latou na o lea ua taulamua i le faatupeina o le tatou dam lea ua taua i Alaoa. O le taimi nei, ua tele o le tupe lea e manaomia e \$100 miliona Amerika lea ua i ai. Masalo o le fuafuaga lava latou ia, o se taimi o le lata i le faaiuga o le tausaga nei ua amata le galuega, ona o le tulaga foi lea e tatau ona fai tauofoga. Ia, ou te manatu foi, e le maua i totonu o Samoa se konekarate e mafai ona faatino lea galuega, e tele ni tomai taua mai fafo.

A o le tulaga lea, masalo toeitiiti lava atoa le \$100 miliona Amerika lea ua tapena ma ua sainia foi, ia o le manatu lava foi ma le talosaga mai i le tulaga lava lea o le lologa o tatou pe a tetele timuga. E pei foi o lea sa saunoa ai le sui usufono mo Vaimauga Sisifo, o le tala lena. O lea ua uma ona tapena, ua saini foi feagaiga ma le ADB ma nisi, e toatele atunuu, e oo foi i le Malo o Ausetalia, o lea ua aumai le latou fesoasoani, o le talitonuga lava latou, o le a faagaioi i se taimi o le afa mulimuli o lenei tausaga. Ae fuafua lava foi i le tulaga foi lea o lo o tapunia a tatou borders, ona o le tulaga lea e manaomia ona aumaia nisi mai fafo e galulue faatasi ma le tatou Malo ina ia faapena

ona lelei tapena ma faagasolo ai loa le fausia o lenei atinae e sili ona taua. Ma le faaloalo lava.

FOFOGA FETALAI: Malo faafetai. Ia, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, e taua tele le faamaninoga lea ua avatu e le Minisita o Tupe, ona o ia tonu lea e faafeagai ma le itu tau tupe. O lea foi ua vaavaai atu o le a faaopoopo mai foi le Minisita o lo o nafa tonu ma le itu lea tau inisinia.

Na pau lava lea o lou tulai atu e toe faalatele, faafetai i le sui usufono magafagafa o le itumalo i lona faataoto maiga o faafitauli tetele ia. O le tulaga taua tele lea na taua e le sui usufono, o vanu tetele a e i luga i Alaoa, o le matua vanuvanu tetele, e faigofie ai ona pue le suavai. Ma e o manatunatuga uma o tatou e agai i le laugatasi, tatou nei o lo o puapuagatia, o lo o nonofo i le laugatasi, aemaise iinei i le taulaga, e lata mai le tatou vaai. A o lea ua agai tonu lava inisinia i le afuaga o le faafitauli lea, o luga i mauga, o luga i mauga e tatau ona fofo mai ai le mataupu lea, aemaise o le tele o le gaosa lea e faafeagai ma tatou i le taulaga, e sese le mea lea e tu ai le taulaga. O lea e tu i le vaega tonu lava aupito maualalo ua na o nai futu le maualuga. E feoloolo pe a na faapea e tau maualuga teisi ae na o nai futu lava. Ae a oo loa ina sua tutui le tai, ia o le tulaga lena, ua faigata tele ona fofo le mataupu lea. O lea la ua agai tonu lava le saunoaga a le sui usufono mamalu i le mea foi lea tatou te faaigoaina i le faa-Peretania, o le cause and effect, o le amataga ma le faaiuga. E agai uma lava la o tatou manatu i le faaiuga o mea uma, ae o le mea e tatau ona agai i ai o mauga, leaga o i ina lea e pau agai i ai le timuga, faaopoopo atu ma le mea maoae lea ua tupu nei i le fesuaiga o le tau, ua uiga ese le pau o le timu. E le na o Samoa la o lea e aafia ai, ua aafia ai le lalolagi atoa. Na pau o le mea, o le malu o lo o faamalumu mai pea le Atua ia Samoa. Ua na o le suatimu lea e feagai ma tatou, ae le o feagai ma matagi. O afa ia e uunai maia mai le afe ma afe o maila le mamao o le ao o lo o molimoli mai ai le suavai e faasusu le laueleele ma faatutumu o tatou punavai aua le taumafa mo tagata mo vaitau o lo o mulimuli mai e le pau ai se timu.

Lau Afioga i le Fofoga Fetalai, o le itu lea tau ina ou faamamafaina, o lea ua agai tonu lava tatou inisinia, o tama fanau a Samoa i le amataga i le afuaga, o luga o mauga e tatau ona agai i ai le vaai. O le ala foi la lena e le taugofie. O le toe vaega lava lea o le tau, o lea ua aumaia ai le fesoasoani a Ausetalia e faaatoa lelei ai le tau e \$100 miliona. A o nei mea, e sau lava i luga o le alofa tunoa lau Afioga i le Fofoga Fetalai, ona o le vaai mai i le mamao tele o le fofo. O le fofo, e le uma i le 2026, i le 5 tausaga, o le fofo e agai atu i le 100 tausaga, 200 tausaga o lumanai. O le mea lea ou te faafetai

ai ua agai tonu lava saunoaga i le taeao lene i le fofu tumau e maua ai le toomaga mo tatou o lo o afaina i le taimi lenei.

O le tulaga foi na taua e le sui usufono o mea ia o le itumalo i taligalu, tasi lea itumalo e fai lava si umi, tele, ae nonofo i autafa o le aualatele, tafatafa atu o le aualatele i tai, o le sami. O lona uiga, e le mafai ona alofia, e tataua ona fai taligalu. O le isi itu i lau matau i le tasi o afioaga o le itumalo, ua tala i uta, a o le matua leaga lava o le auala. Ma o le auala e tataua ona taua, o le auala a le Malo, e le tataua ona taua o se auala galue.

Lau Afioga i le Fofoga Fetalai, e taua tele le faamanatu lea e aumai, ma o le auala ua tataua ona faataoto i a tatou polokalame e tataua ona ave i ai le faamuamua, ona o lea ua tali mai le afioaga i le faanaunautaiga lea e avatu e le Malo, taumafai i le mea e gata ai ona nofoia eleele tu maualuga mo le puipuiga. Tasi la lea afioaga o lea ua oo i ai le tulaga lenei, o le afioaga ua tala i uta. A o le a le iuga o le tala i uta? O le iuga, o le manuia ai o le itumalo, manuia ai o tagata, aua o lea ua e nofo lava i luga o si ou lava fanua faale-atunuu, na ona e ala ae lava i le taeao, e oso ae le la, ua lava meatoto e fai i le taeao, a o le i sau le pogisa, ua lava meatoto e fai i le afiafi. O mea uma lava ia o lea e taumafai atu ai le Malo e ala ai nei ona fai auala galue, e mafai ona tala i ai i uta le nuu, ina ia tau soso ese mai aafiaga o le malosia o le tau.

Lau Afioga i le Fofoga Fetalai, o si au faaopoopo atu lenei, ae pei lava ona ou taua le Malo tele o Roma na iu ina pulea le lalolagi atoa ae le i fauina i se aso e tasi, na fau faasolosolo. O le Tulafono lenei o lea e faatino ai a tatou galuega. E oo lava i le Malo o Amerika o lo o i ai le mauoloa i le lalolagi atoa, o la e foi e fai faasolosolo, fau faasolosolo, e le uma le faiaso o le Atua. Na pau lava le mea ou te toe fia faamanatu, ua faa-tolu ona alu alu le Malo o Amerika tapuni ua leai se tupe, le pasia le latou paketi, ae le i tapunia lava le tatou Malo, o lea e alu lava le Malo. O a nai seleni o lo o tau autalu mai i le fuafua tataua ma le fai ma le faaeteete o lo o faatino e le Minisita o Tupe ma le latou Matagaluega, o lea e mafua ai ona alu pea le Malo, e ui lava i taimi faigata lenei o le Koviti.

Lau Afioga i le Fofoga Fetalai, o si au toe faaopoopo atu lenei e momoli ai foi le faafetai i le magafagafa o le sui usufono o lo o saunoa nei.

FOFOGA FETALAI: Malo faafetai. Ia, ai pe i ai se isi faaopoopoga a le Minisita o Galuega, tulai mai.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Faafetai mo le avanoa i lau Afioga i le Fofoga Fetalai. Ia, mo le faasaoina o le saunoaga a le Afioga ia Fonotoe, e fia faamauina muamua le faafetai i le Afioga i le Palemia, aemaise foi o le Minisita o Tupe sa saunoa i le taua o lenei foi atinae.

E faafetai foi i le Afioga i le sui usufono, ona o le lagalaga mai o le mataupu lea e taua tele. O lea la ua tapena le Pulega o le EPC aemaise foi le Pulega o

le Suavai, ia le damp lea ua saunoa i ai ma fesiligia, e pei ona taua e le sui usufono lea sa saunoa. Ma o lea foi la ua otooto atu e le Afioga i le Palemia le tulaga taua o le damp lea. Ona e aafia tele lava le itumalo, o le Vaimauga. Ona e pei ona saunoa le Afioga i le Palemia, a ova mai le vai lea ona o le louloua o le tau i le tetele o timuga, ona tafe mai lava lea i i, lolovaia uma lava le taulaga, aemaise ai foi afioaga o le itumalo.

O le tulaga lea ua taumafai le Malo e fai se damp tele lava ina ia taofia ai le tele o le suavai lea e tafe mai i luga o mauga agai mai i lalo, o le tulaga taua lea o le poloketi lea, Aemaise foi e le o po se lilo i le tulaga a tafe mai tafega tetele ae tau mai o la e sua le tai, ua lolovaia uma le taulaga ma le atu Vaimauga ona o le tulaga lea. O lea la ua tapena le fofu lea o le faafitauli, lea na tau atu e US\$100 miliona, le tupe e faaalu ai o lea e faatupe foi e le ADB. Ia tasi ia o tatou paaga e fesoasoani mai tele i tatou galuega fai. E pei foi o isi atunuu lea e alolofa mai ona na o le lima vaivai foi o le tatou atunuu i mea tau tupe. Aua e pei o le tulaga lena, ae ona ou te faatauina foi le saunoaga a le Afioga i le sui mamalu, i le tulaga lea na lagalaga mai ai solo.

Mo le silafia e lau Afioga, o lea ua tapena ni sutesuga po o ni feasibility study, i auala e mafai ai ona faamalosi pe stabilize ai ia slopes ia e lata i le auala, ina ia faaitiitia ai solo i le agai atu lea i Sasae. O lea la ua tapena se galuega e le gata la i i le Anoamaa, e faapena foi i Salafai i Safotu. E i ai foi le mauga lena, o lo o faapena foi ona popole i ai ne i te i ua solo. O lea la e tapena ai le survey lea e tasi, o le a fai le feasibility study, ina ia taofiofia ai le solo mai o mauga na e tulata i tatou auala. E pei o le tulaga la lena o lea ua tapena ae faatupe la e le Faletupe o le lalolagi le World Bank. E pei o tulaga ia e faatau ai le saunoaga a le sui mamalu, ona o mataupu ia e taua tele, i atinae ia e fuafua e le Malo ina ia faatino aua le puipuiga ma le saogalemu o si o tatou atunuu, aemaise ai afioaga ia e aafia.

A o isi au talosaga ia ma ou tali atu nei, ma ou te le toe tali atu ai i se taimi mulimuli, i au auala ia ma au taligalu, o lea ua faatauaina i le saunoaga a le Palemia le tulaga lea. Ua faamauina lava, leaga o auala ia e aafia ai femalagaiga a le mamalu o le atunuu, e tatau ona fai faalelei, aemaise foi o le puipuiga o le tou afioaga mai le aafia i galu ia pe a... Ona o lea e matauina pea ma mautinoa, o le suiga o le tau e le faaitiitia le aafiaga o Samoa aemaise le lalolagi. E faatuputele ina lava le aafiaga i suiga o le tau lea ua feagai ma tatou. O se faamatalaga lea lau Afioga i le Fofoga Fetalai, faafetai mo le avanoa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Fofoga Fetalai, e ai lava na i vaega ia ua pau ia te au. E lelei lava le faaoga pea o le taimi lenei, ae malolo le sui usufono i lana saunoaga. Ae i ai ia vaega ia e 2, ou te toe fia faalauteleina atu, leaga sa ou talanoa ai ma Taitai o le Malo o Iapani a o ou toe taliu mai i le Fono sa ou auai i New York ma ou lele atu ai i luga i le pole

i Matu ma tifa ifo ai i Iapani, i le ma feiloaiga lea ma tapuai ai foi le tatou au lakapi, a o faagasolo tauvaga lakapi o le lalolagi i le tausaga na tea nei. E i ai la le mataupu na oo i ai le ma talanoaga, o le itu i fesoasoani mai i le tulaga lea o le tau.

O le tulaga la lea na ou foi mai ma faatalanoa, i mea ia o le taofia o solo. Aemaise la le tulaga lea na solo ai ia le vaega tele o mauga ia i le alu atu i Lalomanu. O le solo lena toeitiiti oo i tai i le aau le tele, sau mai luga o le maualuga o atumauga ia, ma taofia ai le toe femalagaiga. Ma o le mea moni na tupu ai solo na, ona o lea na aveese mai i auvae mauga ia le asuemu e fai ai galuega a le Malo. Ae manatua lelei, o i i mea uma lava ia e taoto i lalo o le taele, o ala ma maa ia ua asu ese, lea e faalagolago i ai le malosi o mea uma lava ia e alu atu tau i luga i le tumutumu mauga. O lea e taofi uma atu lava i lalo i i, o e fatu atoa lea o le malosi, lea e tumau ai le vaega ia ua le solo. Ae peitai ane la, o le eli lea ma eli pea o lalo ua manunu ai le eleele, palasi ifo loa ma le timu, solo mai loa le solo tele lea. O lea la ua taofi ai e le tatou Matagaluega o lo o gafa ma solo, le Matagaluega o le Siosiomaga, e le tatau ona toe elia lava se mea mai i, i lalo i i i le alu atu lea i Lalomanu, ona o le tulaga lena scientifically i le vaai faasaienitisi, o lalo i i lea e taofi uma ai le mamafa lea e i luga i le tumutumu mauga.

E faapena la le mea o lea foi e solo ai vaega eseese, o lea la e saunoa ai le Afioga i le Minisita, e tasi lea vaega tele ua tatau ona faagasolo, i ai galuega a le Malo. O lau matau la mai i fafo e pei o Iapani ma Israelu, e lua lava auala, i lau asiasiga foi i Israelu sa ou vaai ai i autafa mauga ia e oso atu ai le auala, e alu ai sima, e sima atu lava lalo, Ae i ai ma le isi faiga, lona lua, e tipi mai le mauga mai luga faafasitepu. O lona uiga po o le 200 iata le alu i i tipi, toe fasitepu i lalo tipi, toe faafasitepu i lalo tipi, lea la e build up ai le vaega lea e taofia ai le solo. Seia oo lava ina lata mai i lalo alu loa ma le pa lea sima, e taofi ai, e le taugofie la mea ia. O lona uiga e faitau selau ma selau miliona le tau.

O lea la ua galulue i ai Matagaluega ma ua uma foi ona taoto suesuega o le galuega e tatau ona fai. E aofia ai le atunuu atoa, aemaise lava le alu atu lea i i, e amata atu lava i Letogo alu atu lava e tau i tua i Aleipata. Ia ma i la i Savaii aemaise lava o i le itu lea, pe i o Gagaemauga Nu 2 i i i Safotu. O lea e vaai ai le solo lena, e solo soo lava, o le mea la lea ua agai i ai fuafuaga a lo tatou Malo, ua tatau loa ona puipuia. E le taugofie la ia tulaga ia, ae tatau ona faataoto seleni e faatino loa. A o le itu lava ia o mea ia o faatanoa tetele ia o le a fausia i Alaoa, faapea foi ma isi fuafuaga o taoto e tatau foi ona fausia ni tanoa tetele faapena i vanu tetele ia e taoto ifo i gauta ifo o Ululoloa. E taofi ai foi tafega tetele na e sau mai i ina, lea foi e aafia ai vaitafe ia e pei o Fuluasou, ma e 3 vaega tetele ia silafia e le Maota. E le faapea na ona taofi o le vai, e 3 vaega tetele o le faamoemoe lena, lea e ala ai ona faigofie faalapopotoga i fafo ona malamalama i ai. E manatua foi, e oo i ai sau tautalaga i se taimi e tali atu ai.

O fesoootaiga ma Malo i fafo, e tasi lava le faitotoa, e tasi lava le faitotoa, o le Matagaluega o le Va-i-Fafo. E tasi lava le faitotoa e alu atu uma ai mataupu nei, ma fesoasoani mai ai lea o isi Matagaluega e aumai details. A o le faitotoa lava o fesoootaiga i fafo, e tasi lava le Matagaluega e alu atu ai, e na o le Matagaluega o le Va-i-Fafo. E alu atu ai lava i Ausetalia alu i Saina alu i fea, e tasi lava le faitotoa. O isi taimi e galo ai i tagata le mea lena, ua o sao i sui o Malo ia e i inei. O mea tetele e le mafai ona alu sao se mea, e tasi lava le auala e alu ai. E alu atu i le Matagaluega o le Va-i-Fafo.

Lau Afioga i le Fofoga Fetalai, i le vaai mai la a Malo nei, e 3 mea tetele ia e afifi atu i fuafuaga nei. 1. O le taofiofiga o lolo. 2. O i o le a toe pamu mai ai le suavai taumafa e faaleleia ai ia afioaga ia o lo o oge vai. E moni o i i le alu atu lea i le itu i sisifo o Apia, o la e faalagolago i vai ia e sau i lalo o le eleele. E i ai ana tetele i lalo o le eleele, e punipuni e papa tetele i lalo o le eleele, e tafe atu le vai lea, zip through, ona koletu ai lea i damp natural damp, o lona uiga i lalo o le eleele lea e i ai. O le a lea mea e fai i le vai lea? O le isi lea galuega a le vai, o le teetee ae i luga o le mamafa lea e i luga ae o le anoano o eleele ia e faatoa atu e tatou, ma papa ia e i luga ae. E i ai mea e tutupu i le lalolagi, ua sau sau le vai lea ua pamu pumu mai, ua le alu atu se suavai timu, ona o le mea lea o le tata o laau, e vave ai ona tafe le vai i tai. O le a la le mea ua tupu? Ua mamafa tele ae ua leai se malosi sa taofiofia mai, collapse loa, malepe loa. O tagata uma lava ma atufalega i luga i ina, e leai se isi e ola. O lona uiga, o mea foi tatou te faia i o tatou lima, o lea foi e i ai ia le lamatia o tatou ola. Ona e pamu pamu le vai, ua leai se vai ua faigata ona toe alu atu e faatumu ai, ia faatanoa o le natura lea e i lalo ifo o papa ma le eleele, o le mea lena malepe loa. Ona a lea? Oti tagata ia tagata o lo o nonofo ae ai i luga ma a latou faatoaga. Ua tutupu i isi atunuu le mea lea, o le mea la lea, e le saogalemu foi lau Afioga i le Fofoga Fetalai, le faalagolago i vai ia e pamu ae i le manava o le eleele. E tupu ai foi le oti, o le mea la e tatau ona fai, aua ne i taofia le tatou tilotilo i ala vai e mafai ai ona alu atu pea le vai e i taimi uma, e saofia ai tatou e saogalemu ai lo tatou soifua.

O le ala lena e taua tele ai poloketi lenei, e maua ai le suavai, o le suavai e mafai ona faamama, o le suavai e matua sefe atoatoa e malu ai le soifua o tagata e alu i ai le vai lenei.

Ma le vaega 3, o tatou poloketi tetele nei, e mafai foi ona faaoga e pamu mai ai le eletise e mu ai. E 3 la mea tetele ia e afifi i totonu o poloketi nei, e ala ai ona lololo tele i le vaai mai a i latou o lea tatou te tatalo atu. Ona e 3 mea tetele ia o lo o afifi ai i totonu o poloketi nei e 3. Lau Afioga i le Fofoga Fetalai, o le toe faaopoopo atu lena, ona e taua tele, mea nei e loloto tele i le faautautaga a i tatou nei, ae malamalama lelei a tatou tama fanau, o inisinia na auina i fafo e le tatou Malo, e aoao ai, e toe faaoga lo latou tomai e tautua ai i le tatou Malo.

Lau Afioga i le Fofoga Fetalai, o lau toe faaopoopo atu lena, ina ia malamalama atili ai ia nei mataupu. Ma o vanu uma lava ia, e oo foi i le vanu

lea e saunoa i ai le sui usufono, o mea o vanu tetele na e faalagolago i ai lo tatou Malo i le suavai i le isi 1000 tausaga lea o lumanai. E tupu ae faalou le maga i le toatele o tagata, e tatou te le tio, leaga o faamanuiaga na, na ave ia Aperamo. O le a le faamanuiaga? Ia matua toatele lau fanau, tai pei o le oneone o le sami, ma le tele o fetu o le lagi. O Samoa le isi atunuu o la ua amata ona mulimuli ai, ituaiga atinae na ua leva ona faatonu Aperamo, o le meaalofa lena ua tuu atu ia te oe. Ia faatoateleina le lalolagi, ina ia toatele ai foi le aiga o le Atua.

Lau Afioga i le Fofoga Fetalai, o le toe faaopoopo atu lena i lenei taeao manino ma le taeao totoa.

FOFOGA FETALAI: Se i toe tuu atu lava le avanoa i le Minisita o Galuega.

Susuga Hon Papaliitele Niko Lee Hang: Ia faafetai, ona o le taua tele o le matapu leni, o lea ua taua e le Palemia le isi aoga o le damp lea e maua ai le suavai taumafa. Aemaise la o le isi hydro-power, e mafai foi ona gaosia mai i le faatanoa lea pe a faaoga. E pei o le tulaga lena, na ona toe faaopoopo atu i le isi tulaga lena, o le aoga lena o le damp lea, e le gata i le suavai taumafai aemaise e maua ai foi le isi source o le eletise, aua lava le taumafaiga o tatou ina ia renewable uma le tatou atunuu i se taimi vave. Ma le faaaloalo lava.

FOFOGA FETALAI: Ua manino atoatoa le tulaga o le mataupu. Ia faafetai foi i le sui mamalu ua oo lau saunoaga i lea vaega, ua faamanino ai i le saunoaga a le Minisita ma le Palemia, ia malo faafetai.

Tulai mai le sui usufono.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga, ua toe maua so matou avanoa. O le agaga tonu lea ua saunoa i ai le Palemia e le toe agai foi ...o le amataga ma i i le faaiuga. A tuu la i le gagana faale-Tusi Paia o le Alefa ma le Omeka. O lea ua taua Aperamo ma le fanau e toatele le fanau ae toatasi lava le ava. Ae le faapea e toatele le fanau toatele ava,

FOFOGA FETALAI: Ou te fautuaina le sui mamalu, e aua e te oo i le itu maaleale lena... O la e soisoi le sui Fofoga Fetalai i lau saunoaga.

Tofa Hon LAUOFO FONOTOE NUAFESILI PIERRE LAUOFO: A o le agaga tonu lea, o lea ua sausaunoa foi...

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: E i ai le mea e soisoi ai le

Maota, soiso i foi ma lau Afioga. Aua ua matua nei le sui usufono, o lea ua amio faa-Aperaamo.

FOFOGA FETALAI: Malo faafetai.

Tofa Lealailepule Rimoni Aiafi: Lau Afioga i le Fofoga o le Fono, malie lou loto, leaga o le tatou Fono o lea e agai i tua. O la e faafofoga mai Samoa aemaise tatou fanau o la faatoa o i aoga Aso Sa. E tatau pea ona faasaosao e le sui usufono, o la e silafia e le sui usufono. Ioe, na nonofo ma Sara ia Aperaamo, ae na muamua fanau le teine foi lea o... o lena e silafia. Ae tatau ona toe... leaga o lena e faafofoga mai Samoa, leaga o le sui usufono e toaga i le lotu, ae le faitau Tusi Paia. Ma le faaloalo lava.

FOFOGA FETALAI: O le a leai sau tala leaga sa feagai lau Afioga i le sui usufono mamalu ma le valaau a le Atua i lou tuua. Ia maua pea e lau Afioga le faamafanafanaga mai le Atua ona o le valaau a le Atua i le tina, malo faafetai ua afu lau tautua, o lou manuia lena. Vaai e leai sau palota o lou manuia lena. E ui lava ou te le i faatagaina, ae malo faafetai.

Tulai maia le sui usufono mo Anoamaa Sisifo e faaauau le saunoaga.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga i le Fofoga Fetalai, e leai tatou te faitau uma lava i le Tusi Paia. O le mataupu lea e laga mai e lou uso o Lealailepule, manatua foi o le mataupu tonu lava lea na ave i ai le faatagaga ma le faamanuiaga lea na mafua ai ona fai. Ia o lena...

FOFOGA FETALAI: E le o se aoga Tusi Paia le... Ua ou fautuaina le sui usufono e see ese o lea e lavevea ai uma lava tatou i le upu lea.

Tofa Hon LAUOFO FONOTOE NUAFESILI PIERRE LAUOFO: E leai e... faafetai i lau Afioga, o le mataupu lena, ae o le a ou see ese ma lea foi mataupu taua tele e pei ona saunoa le Palemia. Ae ona o lea sa saunoa le Minisita o Tupe i le tulaga lea, ona e le o i ai se Kamupani o i ai se tomai e fausiaina le... a o lea ua saunoa le Afioga i le Palemia, e lelei lava le tuuavanoa pea ia tatou Kamupani i Samoa nei. Aua o se taimi saunoa lou uso o Peseta, ona faamatala foi lea o le faatanoa la na galue ai i Amerika. Ae fia fono faapipii se...

FOFOGA FETALAI: Ia malie le sui usufono mo Anoamaa se i toe tuu atu le avanoa i le Minisita o Tupe.

Afioga Hon Sili Epa Tuioti: O le fautuaga lea na faapea ai foi le konekarate e o mai e faatino galuega faapenei, o le masani lava e mafai ona

faapaaga ma nisi o tatou konekarate o lo o i ai nei. A o le tulaga foi lele, masalo o le atinae pito sili lea ona faigata le tulaga foi faainisia. O se avanoa lena e tataua ona aumai ai ni kamupani lelei ina ia mafai ai, e fesoasoani ai foi i tatou konekarate e faasoa i ai le tomai ma le...E i ai lea o tausaga ia e i luma, o le a mafai lava e tatou konekarate ona faatino galuega faapenei. Talu ai le galulue faatasi ma i latou ua leva ona latou faia ituaiga atinae tetele ia, i atunuu i fafo. Ae le faapea o le a le avanoa i ai o tatou tagata. O le tele foi o tagata faigaluega, masalo o le 90% o tatou lava tagata o le a fesoasoani i ai i le faatino o le galuega lena. Ma le faaaloalo lava.

Tofa Hon LAUOFO FONOTOE NUA FESILI PIERRE LAUOFO: Ia faafetai mo le avanoa lau Afioga i le Fofoga Fetalai.

FOFOGA FETALAI: Ia malie lau Afioga i le sui mamalu o lo o saunoa, leaga o lea sa e taua le Afioga ia Peseta. Se i tulai mai Peseta pe i ai lava se mea...

Afioga Peseta Vaifou Tevagaena (Faasaleleaga Nu 4): Ioe lau Afioga. Faafetai mo le avanoa, ae ao pea ona ou tali atu pea, ne i faapea foi nisi ua ou le tali i le saunoaga a le Afioga i le sui usufono ia Lauofo. Silasila foi...

FOFOGA FETALAI: Ia e alofa Peseta faapuupuu mai, o le tele o faauilavea o le mea e fia faamalamalama ma fia faaasao.

Afioga Peseta Vaifou Tevagaena: Lau Afioga i le Fofoga Fetalai, o le filifilia o ni inisia faapitoa, e tele ituaiga inisia. Ina ua faasalalau e le Malo le vaa lea o le Salamasina, 1990 na saili ai se tagata inisia ma se uelo faapitoa e mafai ona aveesea, ma uelo le vaa lea. Ina ia mafai ona toe faaoga le sa lea o Samoa. O le ala lena na ou foi mai ai i Samoa. Ona faasalalauina loa lea o le tauofoga e 3 kamupani. Ona ou sau loa lea i le 1990...

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega: Lau Afioga i le Fofoga Fetalai, e le iloa po o le a tonu le mea na tupu. Ona o lea ua le mafai ona taofiofi le sui i lona naunau. O ai ana toe faia le mea i le Salamasina, o la na fau lelei lava le Salamasina ia e inisia. Ae manatua foi o le 1990 i le aso 1 o Fepuari, lea na agi ai le Ofa, o se afa pito sili lea ona maoae i tala tuu o Samoa mo i latou o soifua pea. O se mea maoae ua tupu ia Samoa, e manatua e tagata, taatia ia le afa, na oso i le 1989 o le masina o Mati na oso ai. O lea la e le i taitai ona uma Fepuari, a o Mati na oso ai le afa lena. O lea la na talau uma mai ai e le afa ia vaatau e 6, ae tasi lava le vaatau ma faatietie

talepe i luga o le aau. O lea na maua mai e nisi o tatou, ae le i tanua le mea lea le eleele tanu, na lau ese ai mea ia. Ae a na leai eleele tanu ia, e faila ai pea ma taatitia mai ai pea nei mea tetele, o skeletons o auivi, o vaa tetele ia na talepe e le afa lina i le 1889. O le mea na tupu i le Salamasina, o mai lava galu tetele nei, sii i luga le Salamasina, aumai lelei lava faataatia i luga o le eleele matutu ua uma ona tanu. O le mea ua tupu ua maua atu nei le afa, a o lea ua tutu i luga o le eleele matutu le Salamasina, ua le iloa po o le a le mea o le a fai. Ona faasalalau mai loa lea, o se tagata o lo o i ai se poto faapitoa e fai se faiga e toe ave ai i fafo le Salamasina, ae ia aua ne i afaina. Aua o le mea na tupu, sii manaia ae lava i luga e le galu, aumai teu lelei lava i luga o le eleele fou. O lea la o i ina tonu lea e agai i ai le faamatalaga. Ia fai alii au paupau ma faamanino mea, aua e le malamalama tagata, ae o lea la ua ou avatua le mea lea. O le mea la na tupu, ua eli loa le pufafa tele tulou lava, lale a la e pufafa ai le mea le la, i faiga a le inisinia lea. E na o le pau lea o le mea na mafai ai, ona ave i fafo le vaa, i se auala e gafatia, aua e leai se masini o i ai i le lalolagi, e mafai ona sau sii i luga le vaa ma toe tuu i tai.

O se tagata la e i ai le poto faapitoa, a o lea la e peiseai ua faapena, eli ai loa le mea lea, ae faatalitali i le tai oooo. Ia manatua la o le tai oooo e i ai le mea faasaenisi foi lele, o le pull of gravity, a oo loa ina tu mai le masina faatausiusiu i le taeao, ae oso mai le la, ona tau fai tulei loa lea i le pull of gravity ia le tai. E a le masina lea e i luga ae o le horizon, a e a le la o lea faatoa oso ae. O i la e fetuleiai ai loa mea o tuleiga malolosi ia faale-natura, ona tupu loa lea o le mea lina. Ua sua uiga ese le tai, ua maualuga, o le maualuga la lina, lea na oo i ai le mafauauga o le inisinia lea. Ou te le iloa po o ai le inisinia i lina taimi, ae o lea faatoa ou faalogologo atu, o ia la lea na pufafa ai le mea le la. Ona eli loa lea, tosotoso malie mai lava i fafo, a ua alu atu ma le sami aumai malie ai lava i fafo ia le vaa lea, toeitiiti lava leai se mea na faaletonu. Ae i ai la nai maosiosi, ia over to you...

FOFOGA FETALAI: Ua taunuu ai le upu foi lele, ua toe sii lava e le tama lana uo i luga.

Afioga Peseta Vaifou Tevagaena: Lau Afioga i le Fofoga Fetalai, faafetai lava foi i le Afioga i le Palemia, aua foi o nei Fonotaga o fonotaga tatou te toe, ma ua le toe i ai foi ni tele o ni o tatou aso o totoe. A o le galuega, e sao lelei le Afioga i le Palemia, e leai ma se mea o sese. E leaga, masalo ua 2 masina talu ai, na ou ave a ta o le vaa lea, i le Afioga i le Matagaluega o Turisi, le Afioga ia Sala, o lea e faafofoga mai Sala. O lau talosaga ia Sala, Sala, a e alofa mai, ua matagofie le atinae o le Malo i le teuteuina o gatai le eleele lea o le Fale o le Malo ma tai, ae o le mea tonu lava lea e saunoa i ai le Palemia, e pei o se vai tuloto, aua o i lea na eli. Ae toso mai ai le Salamasina, ua uma ona uelo i tai le Salamasina. Ua pamu mai la le vai i totonu, ua pamu mai la le vai i le lua lea, ae toso mai ai le Salamasina i

totonu, se i faatali ai la le team lea mai Niu Sila, le team lea e o mai e x-ray le vaa. O lea la e i le Afioga ia Sala ata, o lea e faafofoga mai Sala, o ata o le vaa, o lea e i totonu o le vai lea. O lau talosaga lena na ave i le Afioga i le Minisita, malie lau Afioga, e a pe a faaigoa le vai lea, i le Lady Salamasina. E leaga a na leai le vaa lea, e leai le lua la e i o, ma le loto lea. Ae sao lelei lava le mea lea e saunoa i ai le Palemia. Ae ina ua tai oooo, ma ua tumu le vai, e pau lava lea o le mea na matou faatali ai, oo i le tai oooo, talepe loa o le pa maa lea see atu le sami i tai, tafea atu lava le vaa, o le faamalamalamaga lena. Ae leai lava se mea o sese. O la e molimau le Afioga ia Sala lea na ou alu ai ma ata o le vaa lea.

FOFOGA FETALAI: E sao ea pe sese Sala o lena e te tau, tulai mai lau Afioga i le Minisita.

Afioga Hon Sala Fata Pinati (Minisita mo Tagata Tafafao Maimoa Mai Fafu): Amuia foi lenei itumalo o lo o tulai mai ai si ou uso, o lo outou tofi lelei lava lea o Peseta. Pese, o ou mama na, o lena ua uma ona talanoa ia Pule ia tautuana ia oe i le palota. O le mea lea e saunoa ai lou uso, e sao lelei, ae ou te manatu o le a le faaigoaina ia Salamasina, faaigoa i le tamaloa o Peseta mai Savaii, ioe. Aua... a, se ou te le iloa lava pe i ai se isi atamai e o ma Peseta? Ia afai foi e faapea mai ua na fauina le vaa lea na pa i le mea foi lele na alu ai i luga o le masina, e leai e le i pa le vaa, leai na matua oo lelei lava toe omai tagata fai mai, “Peseta, you are the number one Samoan.”

FOFOGA FETALAI: Malo faafetai. Ia ua manino le tulaga o lea vaega ma e... E momoli foi le faafetai i tomali foi ma le agavaa o lo o umia foi e le sui usufono. Malo faafetai, o ou mama na, faafetai ua manino auofala.

Ia, tulai mail au Afioga i le sui usufono mo Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga i le Fofoga Fetalai, faafetai foi i le Afioga i le Palemia o lea ua malamalama le vaa lea, e leai lava ma se mea tau uelo na faia i ai.

Ia, ona tatou toe foi mai lea i le faatanoa.

FOFOGA FETALAI: Se alofa ia le sui usufono mamalu, soia e te sau... Ia saunoa lau Afioga...

Tofa Hon LAUOFO FONOTOE NUAFESILI PIERRE LAUOFO: E pei o le mea mulimuli lava o le faatanoa ua ou see ese ai ma le faatanoa. Faafetai aua o le isi mea e tataua lava ona faamanatu, aua o lea e silafia foi e le Malo ma le Matagaluega, aua a tino mai le faamoemoe lea a le Malo i le faatanoa, o lona uiga ua tele lava le isi sefe o le tatou foreign reserves, aua e

tele tupe lea e alu i le faatauina o suauu lea e aumai i totonu, lea e faaaoaga i tatou afi ia o lo o i ai i le taimi nei. Ia pei o le tasi lena mafuaaga.

Ae fono faapipii se agaga faafetai i le Matagaluega o le Soifua Maloloina i le Afioga i le Minisita foi ma le Malo aemaise le tatou Komiti galulue o le NEOC mo le malupuipua lelei pea o le tatou atunuu i le faamai. Malo faafetai, faafetai galulue, a o talia ai le tui o le vailaau lea pei ona maua, atonu o se aso ona taunuu mai lea i lo tatou atunuu ma faasolo le tatou tui. Ou te talitonu foi masalo ua i ai se polokalame ua faataatia i le faagasoloina o le polokalame lea o le tui, aua o lea e pei e maua atu foi lea i televise ma faasalalauaga mai atunuu lea o lo o faagasolo ai nei le tui, e pei o lea e muamua le vaega foi lea o le au fomaini, alii ma tamaitai fomaini ma tausisoifua, aua o latou ia e galulue mo le laveaiina o tagata ua aafia i le faamai, ona sosoo ai lea ma tina ma tama matutua, ona faasolo ifo ai lea i lalo, e mulimuli le au malolosi. Masalo o le au malolosi lea e lavea ai matou ia e mulimuli ona oo ai lea o le faasologa.

FOFOGA FETALAI: Ia, se i tulai mai le Minisita o le Soifua Maloloina.

Tofa Hon Faimalotoa Kika Iemaima Stowers (Minisita mo le Soifua Maloloina): Lau Afioga i le Fofoga Fetalai, na ona toe... lea ua taua e le sui usufono mamalu. Ua maea ona faataatia le tatou polokalame, ua aveina atu foi i fafo i a tatou paaga o lo o galulue faatasi i le faasoasoina mai o le vailaau mo lea atunuu ma lea atunuu. O tatou na vave lava ona... ia ma ua i ai tatou i le lisi po o le faaiuga o lenei masina po o le amataga o le masina fou. Ia o lea o le a taunuu muamua mai le 5,000 tui. O lona uiga, e 2 tui mo le tagata e toatasi. Tusa la e 2,500 tagata o le a tui. E pei foi ona e folasia, o le sao tonu lena, o le a muamua ona avatu le avanoa i tatou front liners, o i latou ia e puipua si o tatou atunuu i le taimi nei, faapena ma le aufaigaluega o alii ma tamaitai fomaini, faasolosolo mai ai lea i tulaga e pei foi ona avatu ai fautuaga i ē o lo o maaleale tele le soifua, le au matutua, ia ona faasolo mai ai lava lea i le tulaga e faatali ai le toe taunuu mai o se isi a tatou oka, ia ma nisi a tatou vailaau. Ae tatou tatalo pea ia, tatalo faatasi ma si o tatou atunuu ina ia malutia pea si o tatou atunuu i Ona aao alofa e faatali ai le tui lea, i te i lava ua toe oso mai se... a o lea ua lalata mai ia... ataata mai taulelei, ia viia le Alii.

FOFOGA FETALAI: Faafetai. Ua manino lea tulaga. Ia saunoa le sui usufono mamalu.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga. Ia atonu a lelei ona faagasolo lea foi fuafuaga, ia ona toe talatala malie foi lea o tatou feoaiga i le va o tatou nei ma Niu Sila, aua e pei o le tulaga lena. A o mataupu lena tau va o Malo, ou te talitonu o lo o

silasila foi i ai le Afioga i le Palemia i lea tulaga, ia ona toe aumai ai lea o le tatou vaalele, toe taumafai lene atinae a le atunuu, aumai e toe faafealua i i pe a faapea ua malupuipua ma ua faamalieina uma tulaga uma, aua o lea e pei ona silafia sa momoli mai i faasalalauga i le ea i lene vaiaso ua tuanai, ia o la e ua toe tatala feoaiga i le va o Niu Sila ma i i le Atu Kuki. Ae tatou tatalo pei ona saunoa le Afioga i le Minisita, atonu o se aso ona faagasolo lea o ia fuafuaga lelei.

O le mataupu mulimuli e fia oo i ai se tautalaga i le Tala Faatatau Faaopoopo o le Tupe, e momoli atu le faafetai i le Faalapotopotoga ma le Afioga i le Minisita ma le Malo i le fuafuaga mo le flea maketi lea ua fuafuaina e faatu i i i Sogi, a o se mataupu foi sa ou lauga ai i le Tala o le Tupe talu ai ma ou lauga lagolago malosi i le faamoemoe lea a lo tatou Malo. E i ai lou talitonuga, o i i le vaega lea e agai mai totonu o le fagaloa lea e amata atu i tuamaota o le Palemene ona taamilo atu ai lava lea faapea agai atu i o i isi afioaga, alu atu lava i tua i i e i ai fanua faaleaganuu, fanua a le Malo, fanua umia saoloto, ia ma siufanua ia e pito mai i i i le fagaloa o afioaga ia o Vaimoso ma Lepea ma isi afioaga faasolo e tau atu i Vaitele ma isi afioaga la e i le itu atu i sisifo, o se fagaloa tele tele. Ma o lau lava vaai foi lea faale-mafaufau i ai, o le avanoa lea e tatai ma faalatele atu ai le taulaga. E tatau la ona tanumia atu se isi vaega tele o i i le mea tonu lea e faamoemoe mo le flea maketi lea e faatutu ai atinae a le Malo, e le gata i fale o le Malo, ae faapea foi pisinisi ma kamupani. Aua i lou lava lea talitonuga e tele. O lea la ua taoto faamoemoe o le tatou Malo i le uafu, ia, sa ou lauga lagolago foi i lea faamoemoe o le Malo, aua o lau lava vaai i le isi 50 tausaga agai i luma atu, pau lea o le vaega e faalatele mai ai le taulaga o Apia, ae faafetai o lea na saunoa le Afioga i le Palemia ananafi i fuafuaga mo Salelologa ma Asau. O fuafuaga lelei foi, malo faafetai.

A o i i le fagaloa lea, ou te manatu o le tulaga lene e tatau ona i ai, e tatau ona toe tanu mai totonu i i. Ma o le isi itu i lau vaai, e lelei ai le tanumia o se vaega tele i i, e tau taofiofia ai le tai oooo lea e mafua ai ona lolovaia le taulaga o Apia pe a oo ina mamafa timuga. A mafai ona tanumia ma fai lelei se taligalu, taofi le tai oooo ona vave matutu foi lea o totonu o le nofoaga o le taulaga o lo o i ai nei, pe a oo ina tetele lologa. E pei e faapea se manatu, a o lea ua taoto mai fuafuaga mo le tatou uafu. Ia, o lau foi vaai, e tele isi atinae tau uafu e mafai ona fai i ai, fai se tatou uafu mo vaa lau pusaoloa, fai se tatou uafu mo vaa suauu, ia sosoo mai le isi itu ma se uafu mo meli laupasese, o se uafu mo vaa faila, aua tasi lea tupe tele o lo o maua e le Malo o Toga, mo vaa faila ia e afea i i le motu lea i Vavau. Ia fai ma se isi uafu mo mea o vaa foi nei tautai o le atunuu ina ia faaaoga uma le vaega lea. E pei e faapena sau vaai ona o i i le vaega lea it has huge commercial potential e tatau la ona tatou tap in i le vaega lea. E moni, e moni e i ai atugaluga tau siosiomaga, o le tulaga lene e le o maalofia i lenei vaitau o tatou i ai ma ona po nei, e tatau lava ona faapaleni, po o a lava tatou atinae tetele e fai, ia e tau

faapaleni lava ma le siosiomaga, aua le faasaoina ma le puipuiga o le siosiomaga. E le gata i lena, o le tuutiitia o aafiaga o le siosiomaga. Ae i ai lou talitonuga ma lou faamoemoega maua, e mafai lava ona faataunuu. Ia pei e faapena se manatu i i i le vaega tonu lea o le tatou fagaloa.

FOFOGA FETALAI: Ia, malie le sui usufono se i tuu atu le avanoa i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e taua le mea lea ua oo mai i ai le saunoaga a le sui usufono mamalu, ma o le sui usufono mamalu foi sa saofai i totonu o le Kapeneta sa faatalanoa ai mea ia. O vaega uma lava na o lea ua taoto i lalo o fuafuaga a le tatou Malo. E i ai i latou e manatu e aafia ai le togatogo. O le faataotoga o le uafu lea, e sau sao lava le alavaa mai tai, e le aafia ai le togatogo ma afe atu i le tulaga o le a faaloloto, ae le aafia lava le togatogo i le itu lea i sasae, ona e taoto le vaega lea e teu ai uta i le itu atu i sisifo, faalaolao le alavaa mai lava i le gutu o le ava e tau lava i uta. E le aafia la le togatogo lea ona o le taua i le siosiomaga.

O le mea lena o lea e sese atoa ai le faasalalauga a le sui usufono mai i e aafia ai le vaega lea o Vaiusu, a o le ogasami lea e i tai e agai atu agai i sisifo. O lona uiga, o lea e taoto ai fuafuaga uma lava ia mo le vaega o le uafu e taula ai vaa, o le vaega o le uafu na o vaa suauu lava, ona o le itu atu le la i sisifo, o la e foi e i ai le isi ava. O i ina la e faau ane ai i le itu atu lava lea i sisifo o le ava tele lea, la e foi la e i ai le isi ava, tamai ava, e feagai tonu lava ma ni vaa suauu e afea Samoa. Ia manatua foi la, e le toe manaomia se vaega tele e toe soona omai ai ni vaa suauu, ona o lea e i ai le faamoemoe i le taimi lenei i le tele o le tatou fuafuaga lea e i ai, e uma atu le Nofoaiga lea o le a agai i ai, ua mafai ona mumu tatou i le eletise e gaosi mai lava i totonu o mea o lo o maua i Samoa e i ai le la, e i ai tatou fuafuaga ia, e aupito taugofie lava le eletise e sau mai le vai. O le ala lena e taua ai isi fuafuaga ia, e aupito taugofie atu le eletise e sau i le vai, o le taugofie foi lena o le eletise mo nai o tatou tagata. O le ala lena e taua tele ai le eletise lea le renewable energy, e le gata i le la, a o le matagi, a o le vai. O mea ia o lea e taoto uma i fuafuaga a tatou. I le taimi nei, e oo loa i le faaiuga o le vaiaso ua tele ina ua tapuni faleoloa ma tulaga faapena, ua mafai lava e le eletise mai le la, o le vaitafe faapea foi ma matagi ona maua mai ai le eletise moomia e tatou i le tulaga i le taimi lenei. Ae a oo loa i le Aso Gafua ua taufai ola uma mea uma, ia o le mea la lena e moomia ai pea le suauu. Ae o le mea moni lava lena, e oo loa i faaiuga o vaiaso, ua mafai lava ona cater e le renewable energy needs o le tatou atunuu.

Lau Afioga i le Fofoga Fetalai, o lea la ua taoto foi isi fuafuaga ia o lo o agai i ai le tatou Malo e oo atu i le faaiuga o le 5 tausaga lenei ua le o toe

moomia e tatou le kiso, vagana foi taavale, a o lea foi ua agai tatou ina ia faaulufale mai taavale e ola i le eletise e le toe ola i le suauu. O lona uiga o lea mea, o lea ua taoto fuafuaga mamao ia, o le tatou sao lena i luga o tatou commitments po o aiaiga o tatou folafolaga lea sa saina ai tatou i Paris, sa saina ai tatou i Paris, o le a tatou agai i le faaaogaina o le malosi eletise maua lava i totonu o Samoa.

O le taua lea o le mataupu lea ua laga e le sui usufono, o le sui usufono foi sa i totonu o le Kapeneta ma faatalatalanoa faalauaitele ai mataupu ia. O le tulaga la lea i eleele ia e alu atu i i i Mulinuu i Sogi, o le itu taua tele e tatau ona toe i ai se isi auala e alu ifo i tua i i, e alu atu ai i le maketi, le maketi fou lea o le a fau i Sogi, ma faafaigofie ai ona faatino mea ia o alavai ma vaai totoa loa i ai aua o le taimi nei, e faigata lava ona tatou agai i ai fuafuaga, ona o lea e le i faatinoa le manatu lena, e tatau ona i ai se isi auala e 2 ai auala, e ese le auala e sau i le itu lea i tai, ese le auala e alu atu i tua atu i i, e sosolo atu lava i luga o autafa o le togatogo ina ia tau i i i Sogi, ma fuafua atu ai le fausia o eleele ia ma tanumia. O lea foi la ua taoto le fuafuaga i le isi foi auala o le a amata ai ona tanuia Sogi, masalo i le vaega lea i le agai atu i le faaiuga o le tausaga nei, ma fausia ai loa le maketi tele lea. E le gata i lena, a o lau vaai lava ia e mafai ona faalautele auala e 3 ia o lo o i ai nei e agai atu ai i le maketi lea, ma e atinae uma ai loa le ogaeleele lea, ae tatau ona sii i luga le maualuga, aua ne i aafia i lologa.

O lea foi la ua taoto faatalanoaga i le auala faigofie, taugofie e mafai ai ona faatino loa le fuafuaga lena, i nai masina ia o lo o lumanai atu ma amata ai loa fuafuaga ia mo le fausia o le flea maketi ma amata loa ona faalautele auala na. E tai pei o le ui atu o le isi auala i le mea lea e agai atu ai i TATTE faafeagai ma taupousa, e tele lava le vaega eleele lena, e mafai ona oso atu i ina le isi auala, oso mai le isi auala i le va ma le Tusitala e toe faalautele ina ia afea gofie, ae faapea foi isi vaega la e faafeagai ma le tatou maketi i Fugalei. E tele lava mau auala e mafai ona afea gofie ai i i Sogi, ae le gata i lena o le faalauteleina foi o le auala laupapa lea e i Fugalei ua laitiiti tele i le femalagaai ina ua tupu le atunuu, tupu taavale. O le ala foi lena a ou sau ai nei ina ia ou vave oo mai i i, ou te valaau i le fesoasoani a leoleo, ina ia sau se taavale a leoleo e tau faavava ai ina ia ou vave taunuu mai i inei i le tatou Maota nei e le i amatalia le Fono.

O le mea lea ua i ai, o lea foi ua amata agai mafaufauga i le faataotoga o auala mo le agai atu i le lumanai, e ono aafia ai ma auala e alu i luga i totonu o le taulaga. O le mea lea ua tupu, ua tele naunau taavale ua faaulufale mai, a ua amata ona uumi laina. O le mea la lena e taua tele mo Malo magafagafa, ia plan ahead e faaaoga i ai tatou inisinia, plan ahead, ia aua ne i pueia tatou i le nofonofa ae tutupu mai mea ia i lo tatou atunuu ona ua tupu le maualuga, ua tuputupu pea le maualuga o le soifua ua tatou i ai. Ae le gata i lea, a ua tuputupu ae foi le tele o pisinisi ua faatuina i totonu o Samoa.

A o le uafu lava ia, o lea ua taoto fuafuaga uma mo le faatinoina. E manatua foi la le tala na ou avatua, e sau lava le alavaa mai tai e tau i uta, o lona uiga, e le mafai ona toe oso atu se auala i i i Mulinuu, a o le a alu ae le auala i uta i o fuafua tonu ae lava i Vaitele i le mea o lea e i ai le tele o pisinisi ia, ina ia faigofie ai ona alu ane le tele o uta ma agai loa i ai, ma le toe faa-feomia ai tatou auala nei ona o loli tetele i le tatou aai i Apia, le taulaga, ona o le ui mai o uta tetele nei mai tai i le taulaga ma oso mai ai mai tai i le taulaga po o le uafu i Matautu ma oso mai ai ma faalavelave i feoaiga o tagata i totonu o le taulaga. O lea o le a faapuupuu ane i o, o fuafuaga mamao na e vaai foi agai i le lumanai. Ma e pei lava ona ou taua atu, e i ai le taimi po o le isi 20 tausaga ua tele pisinisi e tutupu ae i i i le alu ae lea i Vaitele alu ifo i Tafaigata faasolo mai ai i Ululoloa, faasolo mai ai i Tuae fu faasolo mai ai i nuu ia e tai pei o Sinamoga, Alafua, ona o eleele tu maualuga ia e le aafia gofie i lologa.

Lau Afioga i le Fofoga Fetalai, o le vaai mamao lena a le Malo lenei mo le agai atu i le lumanai, ua taoto foi nisi o fuafuaga e faatino faasolosolo.

FOFOGA FETALAI: Ia, malo faafetai. O lea ua tatou toai taunuu i le tatou malologa masani.

O le a faataatiaese Galuega a le Fono Aoa mo lana malologa.

Na faataatiaese Taulumaga a le Fono Aoa Faitulafono mo lana malologa masani i le itula e 10:40 i le taeao ma toe faaauau i le itula e 11:21 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Taulumaga a le Fono Aoa Faitulafono. Malo onosai mo le faatinoga o le tatou Galuega.

E faia le malologa ma faataatiaese Galuega o saunoa le sui usufono mamalu mo Anoamaa Sisifo. Ma ou te tapa ma le faaaloalo lau Afioga i le sui usufono e faaauau le saunoaga.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga i le Fofoga Fetalai. Ae faamauina foi le faafetai i lenei itula o le aso ua maea le taligasua a Afioga i sui usufono mamalu o le Maota, ua sao i alo le taumafaga, ua maua foi se faasiliga malosi e faaauauina ai le tatou Galuega. O le mea lea e momoli atu ai le faafetai. E faapea foi le Failautusi ma le Ofisa.

O le faaauauina o se manatu a o se lagona i le Tala Faatatau Faaopoopo o le Tupe lau Afioga i le Fofoga Fetalai, e na ona toe faamanatu atu ia pe faafesili foi i le Afioga i le Minisita o le Soifua Maloloina, o se mataupu sa ou taua i lau lauga i le Tala Faatatau Autu o Tupe i le tausaga na tea nei, i le tulaga foi lea o se fesoasoani mo le tatou au galulue ia o lo o galulue mo le puipuiga o le Koviti i le tulaga foi lea aua se faalavelave po o se mea e ono tupu mai e aafia ai o latou soifua. Na ona toe faamanatu atu le tulaga lea. Masalo o lo o i ai foi vaega i lalo o le Tulafono a le ACC i mataupu tau Occupational Health and Safety, ia atonu o lo o i ai foi se tulaga faapena. Ia ma faamanatu atu lau Afioga i le Minisita, e i ai nai alo foi ma fanau a lenei itumalo o lo o galulue i luga o a tatou vaa ia e o i tai, ia o la e talosaga mai po ua taunuu se latou hazard allowance foi lea sa talanoa ai. Ae taoto atu, taoto atu i autafa o lau Afioga e silasila atu, atonu o se taimi ona oo lea i ai o lau fuafuaga.

FOFOGA FETALAI: Malie le sui usufono se i tulai mai lava le Minisita mo le Soifua Maloloina.

Tofa Hon Faimalotoa Kika Iemaima Stowers: Lau Afioga i le Fofoga Fetalai, e pei foi ona saunoa le sui usufono mamalu i lana faafetai o lea lava ou te faamauiina mai lau sausaunoaga i le tatou fonotaga talu ai, o se tasi lea o mea sa e saunoa mamafa i ai, aemaise mo latou e ono aafia i galuega o lo o faapena ona latou faatinoina mo le puipuiga. Ia, faafetai o lea foi sa... o lea ou te manatua ua i ai le faatonuga foi i se tasi o fonu a le Kapeneta e taatia atu i le PSC, tapena mai loa se faiga faavae ina ia tilotilo i ai le Kapeneta, ia ma aumai ai foi se faaiuga a lenei Maota, e tusa ai o mea sa taua i saunoaga a sui usufono mamalu. Ia, o lea foi e faafogafoga mai le Komiti o Faalavelave Faafuasei faapea foi le Matagaluega, ia atonu e le o toe mamao ona aumai foi lea o se latou fautuaga e tusa ai foi ma alo ma fanau o lo o faapena ona galulue faa-seila i luga o vaa e pei ona e saunoa i ai.

Ia, ma le agaga faaaloalo lau Afioga i le Fofoga Fetalai.

FOFOGA FETALAI: Faafetai. Ia, se i onosai le sui usufono se i tulai mai le Minisita mo Pisinisi ma Alamanuia aemaise foi o atinae eseese a le Malo.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Faafetai i lau Afioga. Ou te tulai atu ona o lea sa taua e le sui usufono mamalu ni faamanuiaga, tau i lalo o le Tulafono a le ACC. Ia, atonu o lea e taatia le tatou Tulafono o lo o galulue ai le tatou Faalapotopotoga lea i le taimi nei, ona o tulaga o mea nei o le faamai, e pei o se mea fou le mea lenei ua oo mai, ae ou te talitonu o lo o i ai le vaega o le tatou Tulafono e

mafai ai ona silasila i ni tau e ono agavaa i ai latou nei o lo o expose i le taimi lenei i le taumafaiga e puipui le tatou atunuu mai faamai.

Ua maua foi le avanoa lau Afioga, e le toe faauilavea i le saunoaga a le sui usufono ona sa taua foi e le sui usufono mamalu le tulaga o le toe faaauau o le tatou atinae o le vaalele, e faauiga i le lauina mai lea o tatou vailaau ma isi tulaga faapena. Ia, o le tulaga lava ia, o lo o faaauau lava le atinae, e le faapea ua taatia. Ae ona o le taimi lenei i le tulaga ua i ai tapu a le lalolagi, ia o lea e fuafua lelei le taimi e toe oo mai ai le tatou vaalele. O le faapaleniga o le taimi e aumai ai ma le naunautaiga ina ia toe faaauau le atinae lea, o le issue lenei, it's a timing issue ia taunuu mai, fealuai loa. O lea la e fai lava fuafuaga uma ina ia i ai galuega a taunuu mai le vaalele ona faatino lea. O le faatuatuai laitiiti lenei ona e le o po ma se laina le tulaga ua i ai nei le tatou lalolagi, a o le atinae ia, leai o lea lava... tasi lenei miti a le tatou Malo. Faafetai foi i le sui usufono mamalu, tasi lava lenei sui usufono e lagolagoina tele le atinae lea, ma o lea ou te manatua lava le saunoaga a le sui usufono mamalu ina ia tapue le tatou atinae lea, ona e mamao le vaai a le tatou Malo.

E faafetai ai i le sui usufono mamalu i lona lagolagoina tele o le tatou atinae lea. E lagolago foi e le lauga a le sui usufono le tatou atinae lea i Sogi. Ia, o le masina nei e amata ai ona faatino le tanuina o le tatou... amata loa le tatou maketi ona faaauau ai lava lea. E 2 eka le mea e tanu muamua ona avatu loa lea o le maketi e faatu ai, ona o lea ua leai ni mea e o i ai nai tagata ia sa i gatai. Ua ala foi ona o ese ia o le isi foi fuafuaga a le Malo mai gata i le mea lea e i talaane o le fale i'a. Ia o lea la ua o ese uma latou, ona o le isi foi fuafuaga a le Malo. O lea foi la ua i ai le kamupani lea ua manumalo i le konekarate e latou te fausia le fale e agai i ai latou nei mo le taimi lenei ae amata loa ona fai le tatou maketi lea i Sogi. O mea uma nei, o mea e link faatasi uma e le o ni mea e atinae tu tu toatasi. O le holisitit approach a le Malo i atinae uma nei ae fesootai uma lava.

A maea nei ona tanu gatai i i ma tu le maketi, ma fai auala ia e pei ona saunoa le Palemia, o le a matua tele lava se vaaiga fou. O le a tele lava se vaaiga fou i gatai atu o le mea lenei i Sogi. Taunuu atu ai ma le tatou faamoemoe i le uafu, ia ua atili ai le tele o le vaaiga a le Malo lea ua agai i ai, lea e i ai ia fuafuaga tai tasi tasi nei. Ia ae atonu e le o toe umi se taimi i le faaiuga o lenei tausaga ia o lea o le a tilotilo i ai i le suiga o le vaai i tulaga uma o le a tulai mai. Ia ma lou faaaloalo ae faafetai tele i le sui usufono mo lona lagolagoina o tulaga ia, faafetai.

FOFOGA FETALAI: Malo, malo faafetai, ia na ona faafofoga atu i lau Afioga i le sui usufono o Anoamaa Sisifo o lea ua maea lou taimi faatulafonoina, toe o le taimi lavea lea ua tuu atu i lau Afioga e faaauau ai le... aua e tatou te maea nei i le 12, e tatou te manava i le 12 fua i ai le saunoaga a lau Afioga i le sui usufono mamalu.

Tofa Hon LAUOFO FONOTOE NUAFESILI PIERRE LAUOFO:
Faafetai i lau Afioga i le Fofoga Fetalai, ia e fai o le taimi lavea o lenei sui usufono, ia e fai foi le taimi lavea o le la Itu. Ia a tuufaatasi la, o lona uiga e uma le ½ itula e... ae o le a taumafai atu, faaiu atu.

FOFOGA FETALAI: Ia faafetai, o lau galuega o le logo atu...

Tofa Hon LAUOFO FONOTOE NUAFESILI PIERRE LAUOFO:
Faafetai i lau Afioga, faafetai. Ae ou te le i oo atu i le faafetai e... i ni faafetai faaiu, e tatau lava ona ou faapea atu, e momoli le faafetai i le Afioga i le Palemia ma le saunoaga nei i le taeao, taua ai foi nai taligalu ia ma nai auala galue ia e agai i uta o lenei itumalo ona ua tele ina nofoia e tagata aemaise lava le afioaga o Solosolo.

O lena ua silafia e lau Afioga i le Minisita le talosaga a lenei sui usufono, ia o lea lava o lo o taputapu ai ou faiva, faatalitali. E pei foi lava ona ou faalelele agai i le itumalo, ia lava pea le onosai, faapalepale ia e faagasolo atu lava ia tatou galuega i se aso ona taunuu atu lea.

Ae momoli atu le faafetai a lenei itumalo i le Taitai o le Malo, faapea foi ia le Kapeneta ma Minisita Lagolago, Matagaluega uma ma Faalapotopotoga a le Malo, ia malo le galulue. Faafetai foi i Kamupani Tumaoti ma le au galulue uma o le atunuu. O lea ua iu ma le manuia galuega a lau Palemene i lenei 5 tausaga. Ia faapea foi se galuega lagolagosua atu a lenei Itu o le Maota i le Afifio atu o Afioga i Taitaifono ma Sui Taitaifono, Sui mamalu o Komiti Tumau Faa-Palemene, i le latou foi pitolaau e lagolagosua ai i galuega Faa-Palemene o le tatou Maota i lenei 5 tausaga. Ia faamalo le saili malo.

Lau Afioga, ia ona faaiu atu ai lea i sina upu lenei i si ou itumalo. Ia lou itumalo e, e leai se manatu o le a fai ia se tatou upu faaiu i lenei aso, ona o lea lava o lo o galue ia le tou sui usufono. Ma o le tou sui usufono e le malolo e galue pea. Ioe, se i tau lava i le aso o le palota pasi le aso o le palota ou te galue lava. Ioe e faapena le agaga, o le agaga o le fia auauna pea, tautua pea. Ia lo tatou itumalo mai ona Tupu ma Ee, ia le Paia o lo tatou itumalo e manatu o na e tausi e faleupolu ma tulatoa, ia mai lava i Tupu ma Ee seia oo atu i fanau iti.

Faafetai tapuai, e pei lava ona silafia upu masani a le atunuu, 'o faiva lava e tapuaia e ae ma le manuia'. Faafetai i la outou faatuatuga o lo o ou seei ai pea i le nofoa o le tatou itumalo. Faafetai foi i le itupa Paia mo latou talosaga ma le latou foi tapuaiga, o lea ua ae ma le manuia galuega a lenei Paeaiga.

Ua loaloa tausaga o osi osi pea le tatou Feagaiga, e ala i le tofi sui usufono o le tatou itumalo. Ia ona ou manatua ai lea i lou mafaufau le aso o le Faiga Palota na lau mai ai le iuga ua faamanuiaina lou sui. Ia sa tatalo ai se tasi o faifeau o le tatou itumalo sa o tatou faatasi. Ia faapea lana saunoaga 'o le aso lenei, ua osia ai le feagaiga i le va o le tatou itumalo ma le sui usufono ua

filifilia'. Ia faapea lea o le upu a le faifeau, 'o le osigafeagaiga leni, ua ia faatusaina i le osigafeagaiga na faia i Kapanaumi'.

Ioe, manatua foi la e 2 lava mea taua na tutupu i Kapanaumi, lea na liliu ai e Iesu le vai ma avea ma uaina lelei, taumamafa ai le itumalo. Ia ma o le Vavega muamua lava lena na faia e Iesu, lea la na saunoa ai le faifeau, ioe i le vaega lea. Ioe le itumalo e, ia o galuega lelei, ia o le pine lea o le tauaveina o le mamalu o le tofi o le itumalo. Ioe, o le tulaga lena.

Lua, fai mai le faifeau, o le osigafeagaiga i Kapanaumi, faamausali ai le Tulafono a le Atua. O so o se osigafeagaiga e molimauina i luma o le Atua, e na o le Atua e mafai ona ia tatalaina. Ioe, amen. O le upu a le faifeau e le o ni upu a au o le upu a le faifeau. Ia, ua ou manatu lea...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Se faamolemole lava po o ai le faifeau? E ala la ona ou taua, e taua tele tusi ia e 2 e fou i lau faalogo, ae se i tau mai po o ai le faifeau e agai atu ai ma lou uso lena e i tafatafa ane.

FOFOGA FETALAI: Ia, ou te...

Tofa Hon LAUOFO FONOTOE NUAFESILI PIERRE LAUOFO: Ia ou te musu e tau le suafa o le faifeau, e pau lava le mea lea ou te iloa, e sau mai Lepa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea na ou fesili ai, leaga o faifeau uma i Lepa, e ese mea na fai ai mea ia. O le ala lena na ou fesili atu ai, leaga e faapena e fai ma faitau eseese foi lava isi i le tele o mea i totonu o le Tusi Paia, e tai pei la o au.

O au e tele ina ou faalogo, ae o le mea lena ou te musu ai te i ua pei lau faifeau o au, e alu i mea faalogo.

FOFOGA FETALAI: Malo, ia ou te... amuia lau Afioga o lo o lelei lou finagalo e te manatua mea i aso ua mavae, malo lava faafetai. Ia ae saunoa e faaauau le...

Tofa Hon LAUOFO FONOTOE NUAFESILI PIERRE LAUOFO: Ia o lea e... o mea uma lava lea ou te maua ma ou iloa, o lea e faasoa mai e Faumui ia au, ioe. Afai la e faalogo mai lau Afioga i le Palemia e sese, fesili ia Faumui.

FOFOGA FETALAI: Ae faafefea lena e i ou tala atu?

Afioga Hon Faumuina Tiatia Faaolatane Liuga: Lau Afioga i le Fofoga Fetalai...

Tofa Hon LAUOFO FONOTOE NUA FESILI PIERRE LAUOFO: Ou te oo i ai i se taimi.

FOFOGA FETALAI: Ia, ona o lea ua taua le igoa o le toeaina, ia se i tulai mai Faumui.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai...

FOFOGA FETALAI: Ua ou vaai atu o le Tusi Paia na e i luma o oe.

Afioga Hon Faumuina Tiatia Faaolatane Liuga: E a foi lea ou te le i faia se lotu e fai ai se feagaiga a le Afioga i le sui usufono ma lona itumalo. E molimau sese ina la... o au na o le ataata lava ma ou faaamene i ai, aua e foi lea, o lea lava e silafia e le Afioga i le sui usufono ia lana faifeau na faia le feagaiga. Ma lou faaaloalo.

FOFOGA FETALAI: Ia malo faafetai.

Tofa Hon LAUOFO FONOTOE NUA FESILI PIERRE LAUOFO: Faafetai i lau Afioga, ia aua e pei o si ou tama lea ou te faalagolago i ai i le Mataupu Silisili. E lelei tele ioe, o le valaau i le Perofeta lea ua ou manatua ai i i, lea o lo o aumai i le Tusi a Esekielu. Esekielu e fia foi? Ia Esekielu e 20 i lona Fuaiupu 37. O lo o faapea mai, 'ou te taitaiina outou, i lalo o le tootoo ma faaooina outou i noataga o le Feagaiga Tumau'. Ia Amen, ia e faapena sou lagona faafetai.

Lou itumalo, malo le tapuai. Ia i ou uso a tauva, ia malo, faafetai le onosai. Malo le onosai o lea ua outou silasila e le faigofie foi nei mea o le sailiga o malo. Ioe, ae malo le onosai, malo foi le lototele. Ioe e le faigofie le sailiga o malo, ui i lea e ui ina tele tala feaveai, ia faasalalauga i luga o telefoni ma upega tafailagi, faasalalauga e pei foi lea e faaita ai le isi i sui tauva, faasalalauga e faaleaga ai nisi sui tauva, faasalalauga fai mai o le a pau le sui usufono. E oo i le le toe tu mai le sui usufono, ia fai mai ua uma le taimi o le sui usufono, ia ae maua lava ia lou mafanafana, pe a ou mafaufau i le tama o Tavita.

O le tama o Tavita i le taimi o feagai ai Tavita ma le matamata ita o ona fili ia te ia. O lea na nofo ai i lalo le tama ma tusi le pese. Ioe, pese o lo o faamauiina i le Salamo. O lea sa taua le Salamo i le vaiaso lea na tea nei toe tau foi le Salamo i lenei vaiaso. O le Salamo e 23, fai mai le Fuaiupu 4 e pei ona lau silafia, o le Salamo e pito i lauiloa lea o le lalolagi, Pese e pito i sili

ona lauiloa, lauiloa i le lalolagi e pei ona fai mai ai le Fuaiupu 4. “E ui ina ou savali i le vanu o le ata o le oti, ou te le fefe lava i se mea e tasi”.

Ua ou aumaia le Pese lea, ona ua tele le mau pese ua usu i le Maota, ae pau lava lea o le Pese e pito sili ona lauiloa i le lalolagi, ioe. Ia le au uso e, o se upu faamafanafana a le Failauga i lenei aso. O se upu faamafanafana mo i tatou ua maua i le loto popole. Aua le popole, aua, ioe, Faaolesa, aua le popole, aua, ioe. Sili aua le popole, mafaufau ia Tavita, ioe Tialavea, popole la oe.

Afioga Hon Tialavea Fea Leniu Tionisio Hunt (Minisita mo Leoleo ma Falepuipui): Lau Afioga i le Fofoga Fetalai pe maua se avanoa? Ua tau lo ta igoa.

FOFOGA FETALAI: Ia leaga ua e taua ia le igoa o le toeaina, se i tulai mai le toeaina. Ia tulai mai Tialavea, lau Afioga i le Minisita o Tupe Maua.

Afioga Hon Tialavea Fea Leniu Tionisio Hunt: E na ona faamanatu atu i le sui usufono, faafetai mo le fautuaga. Ou te le popole, leaga foi o lou uso tuofe lea ma te tauva. O ai lava e sau o matou lava, e pei pe oo atu i ai ua faamavae o le a alu e tautua le Ekalesia, ae tuu mai le avanoa ia te au.

FOFOGA FETALAI: Ia malo, tulai mai lau Afioga.

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai, o auga lea o aute. O le alu lea i aga faatamalii lea ia ma faakerisiano foi aua o lea o le a taua le Ekalesia e tapuai le Susuga i le Faifeau.

Ia lo tatou itumalo, ioe, ia manatua aua ne i galo, o le manumalo, o le malolo, o le mea e tafea, o le mea e tafea, ae o le fai uso, e tumau pea. O lea la ua saunoa Tialavea, ioe, malo, o le agaga lena, tatou ave i luma.

Ia lau Afioga i le Fofoga Fetalai, ua malamalama ma malama foi i ulugalua lou itumalo i lou manao, e le toe na ma le laina ua silafia ua uma ona feiloai ma tupu ma ee o le itumalo. Na faaleo foi le manao, e faaauau pea le tautua, e tautuaina o le itumalo, e ala i le tofi faipule o si o matou itumalo. O lea la sa e taua ia Solomona le tupu ma Seepa i le vaiaso na tea nei. Ona toe aumai ai lea i lou mafaufau ia le taimi foi lea ua luluti tiga, ua malomalo le gasegase o le alii. Ua salalau le tala ua toe lava o ni nai minute to le manava iu le soifua o le tupu. Ae faateia Isaraelu i le nofo ae i luga o le toeaina ma faaleo ona toe manao. O le toe manao lava lea o le toeaina, fai mai le toe manao o le toeaina. Ua toe fia sogi tasi lava, ua toe fia pai tasi lava i le momosi o le tino o Seepa. Silasila lau Afioga, e pei o le vaega lea, o le manao, toe pai tasi, toe pai tasi. Lou itumalo na talia lelei e Seepa le manao o le toeaina, talia lelei le manao. O lea la ua maua ai loa le gafa, o le gafa tau

tupu lena o lea ua soo ai le lalolagi. O lea foi ua i Samoa nei, a lea e afio atu le Tuiatua Faanofonofu.

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, ua fasi fua, ua foa e le i fai misa.

FOFOGA FETALAI: Malo, ua manino auofala i le tulaga aloaia. Tulai mai e faai mai le saunoaga.

Afioga Hon LAUOFO FONOTOE NUA FESILI PIERRE LAUOFO: Ia faafetai lava i lau Afioga, e pei o le tulaga lena i le gafa tau tupu lea a lau Afioga i le Tuiatua Faanofonofu lou uso a faipule. Ia malo faafetai lava.

Masalo leaga o lea ua ou vaai atu i le taimi ua faaiuu. O le a fai atu au upu faai ia, ona toe faaauai ai lea o lau lauga pe a toe ae mai le isi Paeaiga fou.

Ioe lou itumalo, e toe auaulalafo ai lava se leo, ma le agaga faaaloalo tele. E saga faamauiina le faafetai i lau pule to ua mafai ai ona ou seei i le Nofoa o le tatou itumalo i lena 5 tausaga. Ioe, ou te faafetai atu ma le agaga vivii ae i le Atua o Malo, faafetai, faafetai, faafetai, faafetai lava.

Lau Afioga i le Fofoga Fetalai, ua faai atu se matou upu, ona o lea foi e nofo silafia le Maota nei, o le Paeaiga faai lena a lau Afioga, o le Tauaofiaga mulimuli foi lena, faapea foi nisi o sui matutua o le Maota, le au lauao sinasina o le a outou malolo manumalo. O le matou tala, ia faapena ona faamanuia le Atua, ua faamalo le tautua Malo ua faamalo le tautua atunuu. E i ai lava lo matou talitonuga e le pau fua lo outou afu maligi. O le matou tatalo ia tau tele e le Atua lo outou gapatia ma lo outou fatuatia, ona o le tautuaina o le atunuu i nei mau tausaga e tele. O laasaga o le lumanai, ia faapena ona taiala le Atua, mau lo outou soifua laulelei.

Lau Afioga i le Fofoga Fetalai, e talu ai ona o au o le Taitaifono o le Komiti o le Vaega Tau le Tamaoaiga lea sa tautua ai le Afioga ia Vaafusuaga, e momoli atu ai foi se faamaisega i le Afioga i le faletua ma le nofoialo. Ona o le valaau paia a le Atua i le Afioga i le sui usufono, le Afioga i le Taulagi, lea ua masaesae ai le lagi, ma ua lagia ai le maota i Mulivai. O le matou foi mafutaga, o se mafutaga fiafia. E tele lava ina talanoa le Afioga i le Taulagi ae faalogologo matou, e pei foi ona molimau se tasi o sui usufono o le Maota i lena vaiaso ua tuanai. A o le mea e matauina, o le mataupu lava e fiafia le Afioga ia Vaafusuaga e talanoa ai, o lana ekalesia. E fiafia tele e talanoa i le ekalesia ma lana faifeau, matou talitonu lava lea o se sui usufono, e le gata e toaga i lana ekalesia ae tasi faifeau. Amuia le auauna, e valaau le Atua ae o lo o faapea ona fai. Ia mau se nofoaga mau i le Oliolisaga e faavavau. O la le Tusi, le auauna lelei e ma le faamaoni, ulufale maia i le fiafia o lou Alii.

E faafetai atu i le Failautusi o le Fono Faitulafono ma le Ofisa, o latou o lo o nofo tuavae aua le tautuaina o le Fonousu a le atunuu, malo le galulue. Ua

mautu atu le faafetai a lenei itumalo foi i isi vaega o le tatou Malo i Matagaluega ma Faalapotopotoga.

O le faafetai mulimuli, e faafetai i nai ou aiga, faafetai mo le lagolago, faafetai mo mea uma, aemaise si ou toalua ma si a ma fanau o lo o tapuai mai, faafetai le lagolago. Ia faapena foi si ou tina matua ua 92 tausaga, malo le tatalo, faafetai i le Atua ua tele ou tausaga ua foai mo oe.

Ia manuia tele le alo atu i le faiga filifiliga a le atunuu, lau Afioga i le Palemia ma lena itu o le Maota, faapea foi lenei itu o le Malu. Ia folau i lagi ma le tapuaiga a Samoa. Soifua ma ia manuia.

Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Anoamaa Sisifo.

FOFOGA FETALAI: Ua malo saunoa i lau Afioga i le sui mamalu, ua tini pao le uto e pei o le faiva o Tapalega ma ua faapena ona faafofoga le Palemene, aemaise foi o le faafofoga tapuai mai o le itumalo aemaise o Samoa. Malo le fai o le faiva e pei o le upu e fai i atua. Ua logo i tino matagi lelei, o le upu a Saulo ia Tavita, “e te faia lava e oe sili ma e manumalo ai pea lava.” O le upu lena a Saulo ia Tavita. Lou itumalo, o lena ua outou silasila i taumafaiga foi a le sui mamalu. E le i fauina Roma i se aso e tasi, e faasolosolo galuega a le Malo. A o tulaga o le atinaeina o le itumalo, e leai e molimauina foi e le Fofoga Fetalai le agaga galue o le sui mamalu. O le mea la lea, ia faamoemoe i le Atua ia auomanu le faamoemoe, ia maua pea le tofa, saili i luma lo tatou ai. O le a lava o tatou finagalo ma lagona e faapena ona tatou lafoai i le Atua e fesoasoani mai e faataunuu i le manuia o tatou manaoga. Malo faafetai, manu faaifo mai i le lagi le faamoemoe. E le gata i le sui mamalu a o tatou o le Palemene, ia faafetai foi mo le upu e pei ona e saunoa. O a foi nisi foi o sui ma o matou tagata aemaise o le tatou galuega e le gata o le toe Paeaiiga lenei i saunoaga a sui mamalu. A o le matou foi lea toe galulue i le Palemene nei, o le matou tala lea. Ona o lea ua tatou taunuu i le taimi e manava ai le tatou galuega ma faamuta ai. Ae tatou te le i tolopo mo le aso Fono i le vaiaso fou.

Ou te tapa le sui mamalu o Falelatai ma Samatau na te saunia se tatalo e faauma ai lenei aso.

Na tolopo Taulumaga a le Fono Aoaofaitulafono i le itula e 11:59 i le taeao seia aulia le Aso Gafua, 8 o Fepuari i le itula e 9:00 i le taeao.